

МЕСЯЦА ЯНВАРЯ В 10^{БИИ} ДЕНЬ.

ИЖЕ ВО СВЯТЫХ ОТЦА НАШЕГО ГРИГОРИЯ, ЕПИСКОПА НИССИЙСКАГО. И ПРЕПОДОБНАГО ДОМЕТИАНА, ЕПИСКОПА МЕЛИТИЙСКАГО. И ПРЕПОДОБНАГО ОТЦА НАШЕГО МАРКИАНА ПРЕСВИТЕРА, И ИКОНОМА ВЕЛИКИЯ ЦЕРКВЕ

На Господи, воззвах: стихиры святого Григория, глас 5.

Подобен: Преподобне отче:

Преподобне отче священнейше Григорие, * трость, исполнена Утешителя дыхания, * и языке яснейший благочестия, * светильниче многосветлый Божественныя зари, * проповедниче истины, * основание Богословия, * источниче догматов высоких, * наказаний поточе медоточных, * цевнице Боговещанная, * песнями Богописанными наслаждающая верных мысли. * Христа моли, Христу помолися, всеумудре, * в струях Иорданских обновльшему мир, * спасти род наш.

Преподобне отче всечестне Григорие, * секира, секущая еретиков стремления, * обоюдоострый мечу Утешителя, * оружие, посекающее прелюбодейная семена, * огонь, хвратныя ереси поपालяющий: * и лопата, воистинну земледельательная, * еюже тяжкое и легкое учений благоразсуждается, * и мерило, извества вся правящее ко стези спасения, * Христа моли, Христу молися всегда, * во струях Иорданских наздавшему мир, * спасти род наш.

Преподобне отче всеблаженне Григорие, * уста, источающая блаженныя гласы, * от неоскудных спасения черплющая и Божественных источников, * слова же молитвы всем сказуя, * правило, правящее к добродетели, * иже виденьми Божественными просвещен, * зарею осияемь Троицы несозданныя, * Еяже и поборник непобедимь был еси, * Христу молися, Христа моли, всеумудре, * в струях Иорданских наздавшаго мир, * спасти род наш.

Ины стихиры Дометиана, глас 1

Подобен: Всехвальнии мученицы:

Иже землю истребити * первее запретивъ всю * и иссушити море хваляйся, * наругаемь верными, показая, * яко птица днесь, * и посмеятельнейш комар: * емуже судися вид, * якоже некое страшилище, * и поправся Христовым угодником.

Дометиан нас, вернии, созывает днесь * к трапезе Богоугодней, * к сему снидемся * благодушия нравом, * и спразднуим ему того исправления, * моляще Спаса душ наших * мир мирови даровати.

Возрастил еси талант Христов, * данный тебе, всечестне, сугубою благодатию, * яко раб искренний. * Темже слышиши: благий рабе, * буди тебе, яко истинну благому угоднику, * и ныне вниди в радость Господа твоего, * трудов прием воздания.

Слава, глас 4:

Премудрости слово твое * украсив добродетелию непорочною, * преудобрен во обоих был еси, Ниссийский Григорие, * Боговещанным твоим гласом * украшая и веселя люди разумно, * Троицы Единобожное премудре излагая. * Темже и православными иноплеменныя ереси победив, * державу веры в концех воздвигл еси. * Христу предстоя с невещественными служители, * и душам нашим испроси * мир и велию милость.

И ныне, глас тойже:

Трепеташе рука Крестителява, * егда пречистому Твоему верху коснуса. * Возвратися Иордан река вспять, * не дерзаючи служити Тебе: * яже бо устыдеса Иисуса Навина, * како Творца своего устрашится не имяше? * Но все исполнил еси смотрение, Спасе наш * да спасеши мир явлением Твоим, * Едине Человеколюбче.

На стиховне стихиры, глас 2.

Подобен: ДOME Евфрафов:

Пение новолепное * да поет вся тварь * от Девы рождшемуся Христу * и крещшемуся * во Иордане днесь.

Стих: Море виде и побеже, * Иордан возвратися вспять.

Труба пророческая, * Предтеча да вопиет: * сотворите Господу, * крещшемуся в струях, * плоды изряднейших деяний.

Стих: Что ти есть, море, яко побегло еси? * И тебе, Иордане, яко возвратился еси вспять?

Возсия сродный с высоты * Божественный Дух * в виде голубине, * зрим несказанно, * ныне Христу притече.

Слава, глас 4:

Житие Божественно исправив, * видением деяние уяснил еси, * Богоявленне Григорие, * мудрость бо возлюбив желанием Божественным, * из уст Духа благодатию обогатился еси * и яко сот меда, * сладость твоих словес искапая, * присно веселиши разумы Божественными Церковь Божию. * Темже на Небесех святительски водворяся, * о нас непрестанно молися, * совершающих память твою.

И ныне, глас тойже:

Тебе, в Дусе и огни очищающа грех мира, * зря Креститель грядуща к себе, * ужасаяся и трепеща вопияше, глаголя: * не смею держати верх Твой пречистый, * Ты мя освяти, Владыко, * Божественным явлением Твоим, * Едине Человеколюбче.

Тропарь, глас 4:

Боже отец наших, * творяй присно с нами по Твоей кротости, * не остави милость Твою от нас, * но молитвами их * в мире управи живот наш.

Слава, и ныне, праздника, глас 1:

Во Иордане крещающуся Тебе, Господи, * Тройческое явися поклонение: * Родителей бо глас свидетельствоваше Тебе, * возлюбленного Тя Сына именуя, * и Дух в виде голубине, * извествоваше словесе утверждение. * Явлейся Христе Боже * и мир просвещей, слава Тебе.

НА ПОВЕЧЕРИИ

Поется возследование преподобнаго Маркиана.

Канон, глас 1.

Песнь 1

Ирмос: Песнь победную поим вси Богу, * сотворшему дивная чудеса мышцею высокою и спасшему Израиля, * яко прославися.

Струями погребшему грех Христу прилепляся, неослабными мановении изсушил еси потоки страстей, Богомудре Маркиане.

Христос, крещаяся, очищает истлевшее страстьми наше немощение, Емуже угодил еси, Маркиане, прилежным, отче, воздержанием.

Богородичен: Дева пребыла еси по рождестве, Бога бо родила еси, Егоже великий Предтеча во Иорданских струях крести с трепетом многим, Пречистая Владычице.

Песнь 3

Ирмос: Да утвердится сердце мое в воли Твоей, Христе Боже, * Иже над водами Небо утвержей второе * и основавый на водах землю, Всесильне.

Иорданския струи, Господи, низшед, освятил еси днесь и, якоже дар и честное и красное приношение, приял еси славнаго Маркиана славити Тя.

Облагаяй небо облаки, Господь одеждою облече тя священною, священнодействующа, и Ангелом говейною, яко Ангела, на земли с плотию пожившаго.

Анастасии Богомудрыя священен храм создал еси, украсив священными и честными возложенными, сего ради с нею, Маркиане, вселился еси.

Богородичен: Грех праотца Иже из Тебе рождейся, Приснодево, во Иорданстей реце потопяет, яко Благоутробен. Егоже Предтеча крестити повелен быв, спряташеся.

Песнь 4

Ирмос: Духом провидя, пророче Аввакуме, Словесе воплощение, * проповедал еси, вопия: * вегда приблизитися лето, познаешися, * вегда приити времени, покажешися. * Слава силе Твоей, Господи.

Играйте, горы, ликуйте, холми: Иисус крещается, Един чистый, преподобнаго память уяснивый, Имже демонов вся лесь омрачися и вселенная просветися.

Умертвив воздержанием плотския сласти, Божественным твоим проглаголением оживил еси мертвецы, в погребение облобызая, отче, и абие умрети повелевая, дондеже приидет всех общее воскресение.

Житие твое, добротю Божественных добродетелей украшено, уясняет верныя, мощей же твоих рака облистает лучи чудес верою приступающим, отче, и верою восхваляющим тя.

Богородичен: Источник Ты спасения родила еси Христа, освящающаго источники Крещением, Егоже Иордан виде, возвратися страхом, Иоанн крещаяй ужасеся, Чистая Дево Всепетая.

Песнь 5

Ирмос: Твой мир даждь нам, Сыне Божий, * иного бо, разве Тебе, бога не знаем, * Имя Твое именуем, яко Бог живых и мертвых еси.

Змиев Ты сокрушил еси главы Крещением, Господи Боже Всесильне, власть давший и силу Маркиану Божественному на демонския лести.

Расточил еси, раздав нищим, твое имение, Богомудре всеблаженне, темже твоя пребывает память во веки и правда.

Умирил еси смущения страстей помысл, преподобне, храм же создал еси Божественнаго мира, именуемый, в хвалу Господню, Иже всех мира.

Богородичен: Дева по Рождестве явилася еси воистинну, Чистая, Бога бо родила еси, Егоже Иоанн в водах Иорданских омывает на обновление мира.

Песнь 6

Ирмос: Пророка Иону подражая, вопию: * живот мой, Блаже, свободи из тли * и спаси мя, Спасе мира, зовуща: * слава Тебе.

Поток сладости подая нам, Иорданскими струями крестися Христос, Иже днесь преподобнаго просветив успение.

Мироположница мысленная мощей рака явися твоих, священне Маркиане, источающи чудес миро к тебе притекающим.

Миродохновенными молитвами отгнал еси огня клокочущаго стремление, спасл еси храм невредим, егоже создал еси, Богоблаженне.

Богородичен: Дева доиши Питателя всех, Егоже Предтеча виде, възграся вопия: Избавление и Спасение всех явися.

Седален, глас 8

Подобен: Премудрости:

Писания от младенства Священная испытуя, Богоносе Маркиане, * Божественне просиял еси благочестия ученьми, * Сына бо и Слова Отцу Единосущна, * и Божественному Духу, проповедал еси, Сопрестольна. * Темже Ариево и Македониево нечестие обличил еси и веру уяснил еси, православно славитися. * Моли Христа Бога грехов оставление подати * чтущим с любовию память твою.

Песнь 7

Ирмос: Сущим в печи отроком Твоим, Спасе, * не прикоснуса, ниже стужи огонь. * Тогда трие, яко единеми усты, пояху * и благословяху, глаголюще: * благословен Бог отец наших.

Жизни наста источник, водами омывающий прегрешения наша, Божие Единородное Безначальное Слово, Емуже благоугоди Маркиан славный, преложься к Нему.

Благомошными бдении воистинну успил еси страсти неудободержныя души и, уснув во глубочайшей старости, блаженне, к Свету отшел еси, яко дне сын и Христов служитель.

Оружие, еже древо жизни хранящее, плещи тебе дарует, мудре. Темже радости райския наслаждаешися, воспевая Виновнаго спасения нашего, Маркиане священне.

Богородичен: Не опалив Твоих ложесн, Христос раждается, Чистая, из Тебе боголепно, Егоже видев Иоанн вопияше: Иисус крещается, спасение верных и избавление.

Песнь 8

Ирмос: Егоже ужасаются Ангели и вся воинства, * яко Творца и Господа, * пойте, священницы, прославите, отроцы, * благословите, людие, * и превозносите во вся веки.

Человеки породил еси Крещением Твоим, Боже Многомилостиве, днесь от земли к неизреченной славе приемый угодника Твоего Маркиана Божественнаго.

Царскою видяще тя людие священнии одеждою облечена, внегда священнодействовати, удивившася, отче, и согласно Христа, всех Царя, воспеша, всеблаженне.

Воздержание стяжал еси и непрестанную молитву, возносящее смирение, и любовь истинную, и безстрастие, отче, сего ради Христос благодать тебе подаде чудес во веки.

Богородичен: Вмещаеши Невместимаго, Дево, паче ума, Егоже имея Предтеча крестити, ужасаяся и трепеща, вопияше: Огнь сый, Христе, не опали мене, любовию поюща Тя.

Песнь 9

Ирмос: Живоприемный источник приснотекущий, * светоносный светильник благодати, * храм одушевленный, сень пречистую, * Небесе и земли пространнейшую, * Богородицу, вернии, величаем.

Торжествуйте днесь, человецы, реки и горы, играйте: Иисус крещается, Спас явился и прославляет Своим явлением Маркиана святое преставление.

Желаний крайнее достиг еси, отрешився уз телесных, Богоносне преподобне, зря светлости святителей, пророков, и апостолов: с нимиже нас, чтущих тя, поминай.

Богородичен: Носиши Бога на руку, питающего Богодельною силою всяческая, Егоже видев Предтеча, Крещения просяща, недоумевает ужасом, Богородительнице, и исполняет со страхом повеленное.

Стихиры, глас 1

Подобен: Всехвальнии:

Отче священнейший, * твоего жития светлостью вселенная просветится, * и омрачится демонская лесь, * недужи отгоняются точию прикосновением раки твоя: * Божественная бо благодать, твоя мощи осиявши, * страстей решит омрачение.

Отче досточудне, * храм себе сотворил еси Присносущнаго Божества, * храмы же воздвиг еси священныя * Божественней Троице на похваление, * мертвыя же возставил еси глаголом, * и милостивен стяжал еси нрав, * раздал еси богатство просящим со усердием.

Наготу просившаго яве, отче, покрыл еси, * наг сам входя во храм святой, * Божественною же одеждою тя Христос облече, * Божественная совершающа таинства, * еяже удивившася доброте видевшии, * и Божия тя познавше угодника.

Слава, и ныне, глас тойже:

Боюся Твоего пришествия, Христе, * обаче повелению Твоему не противлюся,
раб Твой, * се руку мою простираю со страхом: * вижду бо святого с высоты сходяща
Духа, Владыко, * Твоего Единочестнаго * и Отцу Безначальному Сопрестольна, *
свидетельствующа Тя, плотию крещаема.

НА УТРЕНИ

По 1-й стихологии седален, глас 3.

Подобен: Дева днесь:

Владыка днесь на Иордан прииде, крестився в водах от Божественнаго Предтечи. * Свыше же отец свидетельствовал: * Сей есть Сын Мой, в Немже благоизволих. * И Дух явися странным видом голубиным над Ним.

Слава, и ныне, тойже.

По 2-й стихологии седален, глас 4.

Подобен: Удивися Иосиф:

Богоявления время, Христос явися нам во Иордане реце. * Приидите, почерпем, вернии, воду оставления грехов наших: * Христос бо плотию прииде, овчате ища, зверьми похищеннаго, * и обрет, введе, яко Благоутробен в рай паки. * Христос явися на Иордане и мир просвети.

Слава, и ныне, тойже.

Канон праздника первый со ирмосом на 6, глас 2 (зри в сам день праздника) и святых два канона. Ин канон святого Григория, глас 5.

Песнь 1

Ирмос: Коня и всадника в море Чермное, * сокрушай брани мышцею высокою * Христос истрясе, Израиля же спасе, * победную песнь поюща.

Бездна сый премудрости, и разума сокровище, и самоблагости Источник сый, даеши ми, Христе, славныя Твоя Церкве песньми светильника пети Григория.

Приими учителей, Григорие, светлое удобрение, отче, убогое пение твоей приносимое от любве памяти, в нейже Христа нам умилостиви.

Обрете очищену священную твою душу от страстей тимения Сияние Неприступное. Темже, яко вселився в тя, отче, свет ты показа, научающа земныя концы.

Словом, священнотаинниче, богатым же и мудрым, честную Церковь богословити научил еси Единицу Трчисленную и Троицу Сопрестольну и Единочестну, о Григорие!

Богородичен: Вера да вменяется едина, а не показание сущих паче ума чудес, Богородительнице Дево, Твоих, ибо Непостижимаго Бога Слова родила еси, облекшася в человечество.

Ин канон Дометiana, глас 1.

Песнь 1

Ирмос: Твоя победительная десница * боголепно в крепости прославися: * та бо, Безсмертне, * яко всемогущая, противныя сотре, * израильтяном путь глубины новосоделавшая.

Востания плоти, и страстей нашествия, Богоприятне, и востающую в души моей укроти брань, в мирне, отче, устроении соблюди.

Желанием и любовию неуклонною Вышней премудрости прикоснувся, плоть покорил еси и сущая земная оттрясл еси, преподобне, и Бог истинно в причастии был еси.

Дометian чудный, помалу от земли возвышаемь, прииде от силы худыя к совершенней силе и восхождения в сердца положи.

Богородичен: Водами омочив плоти, еже прият Господь смешение, от Твоих содела девственных кровей человечество, ко ополчением противным непоборно.

Ин. Песнь 3

Ирмос: Водрузивый на ничесомже землю повелением Твоим * и повесивый неодолимо тяготеющую, * на недвижимем, Христе, камени заповедей Твоих * Церковь Твою утверди, * Едине Блаже и Человеколюбче.

Плоти убо владыце уму взыграния, Всецарю же ум покорил еси. Темже, непреткновенно путь заповедей прошед, ты Троицы обителище был еси лепотно, Григорие.

Подобно яростное убо на змия души вооружил еси, всеблаженне, желание же Богу все купно простер, к недомысленней и неизменной доброте вперил еси, преподобне.

Деянию видение, отче, приложил еси, темже область Церкви тебе принося, вручает Христос, юже убо непорочно яко небогатаинник управил еси изряднейший, всеблаженне Григорие.

Проходя добродетелей предел, Григорие, и восхождения в сердца твоим ты полагая, от земли взялся еси непрестанным течением к Небесному жительству, прежде от плоти изшествия твоего.

Богородичен: Ты, Мати Божия, несочтанно родила еси из нетленного Отца Возсиявшего без болезней матерних. Темже Тя, Богородицу, воплощенного рождшую Слова, православно проповедуем.

Ин

Ирмос: Едине, ведый человеческого существа немощь * и милостивно в невоображся, * препояши мя с высоты силою, * еже вопити Тебе, Святыи: * одушевленный храм * неизреченныя славы Твоя, Человеколюбче.

В крепости своей враг прелесть, твоя души не могил крепости поколебати, ухищряет во время твоего разрешения, тайнами птиц худых низложити.

Велехвалением своим праведно изничтожествуется приуязвлением змий окаянный, и в вид песиных мух превратится немощию множайшею, и под ногами лежит праведных красными, попираемь.

Богородичен: Из Тебе рождейся без семени Сын Превечный, Дево Мати, мир обнови, сокровенного змия водами в Крещении Своем умертвив Господь и тления человеки избавив.

Кондак и икос праздника (зри в сам день праздника)

Кондак Григория, глас 2.

Подобен: В молитвах:

Церкви Божественный иерарх * и премудрости честный тайноглагольник, * Ниссийский бодрый ум, Григорий, * со Ангелы ликовствуя * и наслаждаяся Божественным светом, * молится непрестанно о всех нас.

И седален, глас 3.

Подобен: Божественныя веры:

Божественное осияние наследовал еси, житие невещественно пожив, * тезоименитным священством просиял еси, * преестественно бо уяснив ученьми, * православием мир утвердил еси, отче преподобне. * Христа Бога моли даровати нам велию милость.

Слава, ин седален Дометиана, глас 1.

Подобен: Камени запечатану:

Священства украшаемъ, отче, помазанием Богоданным, * уяснил еси сие Божественными добротами добродетелей, * и Божественным ко Христу повиновением * и, скончав твое течение, на Небесех вопиеша со Ангелы: * слава благоутробию Твоему, Спасе, * слава Царствию Твоему, * слава смотрению Твоему, Едине Человеколюбче.

И ныне, праздника, глас и подобен тойже:

Иисусу рождшуся от Девы Марии, и во Иордане крещшуся от Иоанна, * Дух сниде на Него, зримый в виде голубине. * Сего ради пророк со Ангелы глаголаше, зовый: * слава пришествию Твоему, Христе, * слава Царствию Твоему, * слава смотрению Твоему, Едине Человеколюбче.

Ин. Песнь 4

Ирмос: Божественное Твое разумев истощание * прозорливо, Аввакум, Христе, со трепетом вопиаше Тебе: * во спасение людей Твоих, * спасти помазанныя Твоя пришел еси.

Яко столп виден был еси всесветел житием же и словом, теплою православия, Григорие, разжжен ревностию, Новаго Израиля предводя.

Благодать приим духовную, ветхаго закона раздрал еси одежду писания и сокровенную доброту нам разума открыл еси.

Всех добродетелей виды Христос показуя блаженствы, Григорие, тебе ввери, яко служителю Слова, пространно сказати концем.

Богородичен: Без смешения убо зачала еси нерастленно во утробе, и прежде болезни родила еси, и по рождестве Дева, Бога плотию рождши, сохранилася еси.

Ин

Ирмос: Гору Тя, благодатию Божиею приосененную, * прозорливыма Аввакум усмотрив очима, * из Тебе изыти Израилеву провозглашаше Святому * во спасение наше и обновление.

Закон благодати показал еси быти сень, сущим в законе Божии евреем чтущим, мудре, и Евангелие истиннаго Богоявления таинство, Христу взывая: слава силе Твоей, Господи.

Облистав яко звезда от востока многосветлая, Церковь просвещаеша, проповедавая Христа, мудрыми показаньми всеблагочестно правды Солнца, Тому взывая: слава силе Твоей, Господи.

Злобы всякия отторгнувся и любви временныя, отче, со тцанием, и просветил еси светом отечества твоего концы, мудре, и сим богатство одождил еси, обильнейшим богатства количеством.

Богородичен: Слово, яко Бог Сый Невидимый, приим от Жены человеко естество видимо, совершает и очищает в реце, Иже греха чуждий, падшаго очищая прегрешения.

Ин. Песнь 5

Ирмос: Одейся светом, яко ризою, * к Тебе утреннюю, и Тебе зову: * душу мою просвети омраченную, Христе, * яко Един Благоутробен.

Ты, яко огонь, попалил еси ересей терноносная плетения словес, верных же умы просветил еси, блаженне тайноводче Григорие.

Евномиево ты изобличил еси беззаконие и сего словеса неудобноизбежная, сетей же пругла зельная, яко паучинная тканя, разорил еси.

Обличил еси, всеизряднейше, безбожнейшаго Македония, Божественный Дух безстыдно укорившаго, яко непричастна сему суца, Григорие.

Богородичен: Ты, правду же и избавление нам рождши – Христа – безсеменно, свободно содеяла еси от клятвы, Богородице, естество праотца.

Ин

Ирмос: Просветивый сиянием пришествия Твоего, Христе, * и осветивый Крестом Твоим мира концы, * сердца просвети светом Твоего Богоразумия * православно поющих Тя.

Призре на землю Владыка твари, и сея поколебашася, Богомудре, основания и люте сотрясошася, тебе же душевнаго мужества, отче, от молитвы не уклони.

Не терпел еси хулящих слышати, славне, на Высоту, и глаголати неправду безумная, но тех обратил еси пастырским твоим жезлом, и недужное исцелил еси.

Едино естество во Христе имущим проповедати, Богоглаголиве, никакоже попустил еси сложное, но тех уловил еси учений твоих мрежею и к свету возвел еси.

Богородичен: Услади вод горесть солию Елисей. Твой же, Богомати, Сын и Бог, крещя в воде, греха горесть и болезнь отъят.

Ин. Песнь 6

Ирмос: Неистовствующееся бурею душетленною, * Владыко Христе, страстей море укроти, * и от тли возведи мя, * яко Благоутробен.

Смирненное мудрование стяжав, всем же кроток борец показался еси, Григорие, противу тщащимся умалити славу Христову.

Ариево отчуждение Троицы, словом богатым дерзостное разделение, Григорие, и всеконечно низложил еси мудрования.

Неученно соединение Тройческое, смешение мудрствуя, тобою Савеллий обличися богоборец, Григорие всеблаженне.

Богородичен: Дева роди, и рождши, пребысть чиста, на руках Носящаго всяческая яко воистинну, Дево Мати, носивши.

Ин

Ирмос: Обыде нас последняя бездна, * несть избавляяй, * вменихомся, яко овцы заколения, * спаси люди Твоя, Боже наш: * ты бо крепость немощствующих и исправление.

Избавишася яко от сети, преподобне, смертныя бедствующии людие, и страстей множество далече молитвами твоими отгнася, ибо сами первии ты имеша заступника.

Потребил еси молитвою, всемудре, стремление недуга, к Деве и Матери Избавителя скоро притек, не бо стерпел еси яко пастырь съй, бедствующей пастве пренебрегаться.

Богородичен: Ужасошася Ангельстии чини, зряще Невидимаго, из Девы рождашася плотию и невещественно славимаго, в реце креститися приходяща.

Кондак, глас 1.

Подобен: Лик Ангельский:

Оком душевным бодрствуя, святителю, * бодр пастырь явился еси миру, * и жезлом мудрости твоя, и теплым предстательством твоим, * вся отгнал еси злославныя, яко волки, * невредно соблюд стадо, * Григорие всемудре.

Икос:

Леностию окаянный отпадох и к смерти уснух, но яко пастырь бодрейший воздвигни мя, отче, и страсти моя успи, зле мучащия мя, яко да, востав, чисте воспою твое светоносное преставление, еже Владыка вселенныя прослави достойно, яко раба вернейшаго, яко учителя всемудраго, яко друга и таинника, и яко строителя Своих преданий, ихже добре сохранил еси помазание нескверно, Григорие всемудре.

Ин. Песнь 7

Ирмос: Превозносимый отцев Господь * пламень угаси, * отроки ороси, согласно поюция: * Боже, благословен еси.

Желанием соединився Трисолнечнаго Божества сиянию, Григорие, всем, яко зеркало, сияя, блистаеши света зари.

Сокровище – словеса твоя отечески оставил еси, обычай души очищение и разума исполнение верою песнопояющим: Боже, благословен еси.

Перваго Ума и виновна, Отца возвестил еси, Слова убо Родителя, купно же Производителя Духа, Троицу песнопоя: Боже, благословен еси.

Богородичен: Едину убо Ипостась во двою естеству, Всенепорочная, родила еси воплощенна Бога, Емуже вси песнопоем: Боже, благословен еси.

Ин

Ирмос: Тебе, умную, Богородице, пещь * рассмотрим, вернии: * якоже бо отроки спасе три Превозносимый, * мир обнови, во чреве Твоем всецел, * хвальный отцев Бог и препрославлен.

Неложное верным совершися обетование проявлено: Божественный бо Дометиан благодати сподобися решити недуги и отгоняти демоны, хвального провозвещая Бога препрославленнаго.

На земли с нами быв и плотски пожив, подаде последовавшим Ему и возлюбившим Его чудодействия благодати хвальный отцев Бог и препрославленный.

Злочестивыя низложи ереси Божественный Дометиан Севирова учения и непреложную веру и Православную боголепно назнамена, хвального возвещая Бога и препрославленнаго.

Богородичен: Отческаго не отступи естества Божественное Слово, воплощся из Девы: Тую бо известно соблюде, пребывшу нескверну в рождестве, и приемлет еже от Отца свидетельство Христос, препрославленный во веки.

Ин. Песнь 8

Ирмос: Тебе, Вседетелю, * в пещи отроцы, всемирный лик сплетше, пояху: * дела всякая, Господа пойте * и превозносите во вся веки.

Всю зарю Утешителю, блаженне, приял еси нашедшую, зовя, преподобне: вся дела, Господа пойте, и превозносите во вся веки.

Истекают нам по Божественному слову Христову из чрева твоего реки разума: воистинну бо источника непрестанна благодать показа миру тя, отче, во веки.

О, чудныя братския двоицы, плотию же сродныя, и Божественныя мудрованием! Сию чтуще, Василия достойно вкупе с Григорием почтим во веки.

Свет мысленный, в тя вселився, отче, свещу тя негасиму миру поставил есть, Единаго Света поюща, Трисолнечна и Божественна, Егоже превозносим во вся веки.

Богородичен: Тебе, паче ума Богомужным словом рождшую Господа и девствующую, вся дела, достойно благословим и превозносим во вся веки.

Ин

Ирмос: В печи отроцы Израилевы, * якоже в горниле, * добротую благочестия чистее злата блещахуся, глаголюще: * благословите, вся дела Господня, Господа, * пойте и превозносите во вся веки.

Превшел еси весь закон естества чловеча, Богу же прилепился еси, Богоглаголиве, желаний Крайнейшему, поя Ему: благословите, вся дела, Господа, и превозносите во вся веки.

Услышав Божественныя заповеди, расточил еси обильно богатство требующим благопокорения помыслом, вопия, досточудне: благословите, вся дела, Господа, и превозносите во вся веки.

Исцелений, Дометиане, неоскуден был еси, источая пиво, источник, и поток сладости, и река мира, вопиющим: вся дела, Господа пойте, и превозносите во вся веки.

Богородичен: В печи Тя образно прописаша отроцы, Дево, и в купине прообрази Моисей, и Давид зря Тя, рождшую Младенца безмужно, Господа славы, Егоже превозносим во вся веки.

Ин. Песнь 9

Ирмос: Исаие ликуй, * Дева име во чреве, и роди Сына Еммануила, * Бога же и Человека, Восток Имя Ему. * Егоже величающе, Деву ублажаем.

Исправлений же и словес твоих блистания, Григорие, восхвалити ум не могий яве наш, исповедует побеждение благопохвально, твое же возвещает паче силы похваление.

Таинниче Небесных изряднейше, Троице ныне предстоя со апостольским ликом и пророческим, мучеников же, и праведных, и патриархов, помяни нас, воспевающих твою память, Григорие.

Назираеши свыше защищая ныне, святителю Церкви Христовы, победы даруя верным людем, и работное сокруши иго, твоя спасая певцы молитвами твоими, Григорие.

Богородичен: Яко рождши, Всечистая, твари Содетеля, по всему Рожденнаго носиши начало, неоскудное имущи величие и преестественное. Темже, Рождеству Твоему поклоняющися, Тя славим.

Ин

Ирмос: Образ чистаго Рождества Твоего * огнепалимая купина показа неопальная. * И ныне на нас напастей свирепеющую угасити, молимся, пещь, * да Тя, Богородице, * непрестанно величаем.

Уставил еси, отче, желания люблений, удержав совершеннейшее, и прияша ты патриархов селения и праведных и преподобных чини, с нимиже молиши о нас Вседержителя.

Имяше, якоже имение честно, твое отечество, тело твое многострадальное скрывшее своими недрами, славне, матерскими устремившееся движеньми: тобою бо наслаждаться чуждим не терпяше.

Гряди помощь быти мне в напастех жития и обстояниих, и утиши воздвигающуюся бурю на мя страстей, и в тихо приведи пристанище ветром, отче, молитвы твоя.

Богородичен: **С**тояше даже до Тебе смерть, еже по нам быти, за еже спасти ны, Пресущне Сыне Божий, благоволившаго из безмужныя Матере, и водами ны очистити, и огнем Божественным Крещения.

Светилен.

Подобен: **Посетил ны:**

Пастыря добраго, Григория всемудраго, Ниссеев председателя, * Василия премудраго единоправнаго брата по плоти, * празднственными песньми прославим вси.

Слава, и ныне, праздника.

Явился Спас, Благодать и Истина во струях Иорданских * и сущия во тьме и сени спящия просветил есть, * ибо прииде и явился Свет Непрístupный.

На стиховне стихиры, глас 2.

Подобен: **Доме Евфрафов:**

Ныне странно Спас * человеком дарует очищение, * кроме изваряя огня * и назидая души * без сокрушения.

Стих: **Море виде и побеже, * Иордан возвратися вспять.**

Воду Божественныя жизни * от источников спасительных, * людие, с веселием * почерпите усердно * душ на избавление.

Стих: **Что ти есть, море, яко побегло еси? * И тебе, Иордане, яко возвратился еси вспять?**

Прииде Просвещение, * Благодать явился, * Избавление наста, * мир просветится, * людие, радости исполнитеся.

Слава, глас 1:

Правыя веры доблий подвижнице, * спострадавый яко добр воин Христа Бога, * и Воеводе угодивый: * подвизайся и ныне по Церкви добрым * подвигом, соблюдая ю твоими догматами * на недвижимем основании, Григорие.

И ныне, глас 8. Иоанна монаха:

Господи, исполни хотя, * яже уставил еси от века, * от всяя твари служители тайны Твояе приял еси: * от Ангел – Гавриила, от человек – Деву, * от Небес звезду, и от вод – Иордан, * в немже беззаконие мирское потребил еси, * Спасе наш, слава Тебе.

НА ЛИТУРГИИ

Блаженны от канона праздника песнь 5-я, со ирмосом на 4, и святого, песнь 6-я, на 4:

Врага темного и оскверненного яда очищением духа измовени, к новой пристахом неблазненной стези, вводящей в неприступную радость, едином приступну, имже Бог примирился. [Дважды.]

Видев Зиждитель во мраце прегрешений пленицами неизбежными, егоже вообрази персты, поставляет на обою раму воздвиг горе, ныне во многотекущих водах омывая студа древняго, Адамова злаго нрава.

Со благочестием притецем прилежно, ко источником пречистым, течения спасительного, Слова усматривающе от Нетленных, почерпала приносяще жажди Божественныя, мѣра сладостне исцеляя недуг.

Смирненное мудрование стяжав, всем же кроток борец показался еси, Григорие, противу тщащимся умалити славу Христову.

Ариево отчуждение Троицы, словом богатым дерзостное разделение, Григорие, и всеконечно низложил еси мудрования.

Слава: Неученно соединение Тройческое, смешение мудрствуя, тобою Савеллий обличися богоборец, Григорие всеблаженне.

И ныне: Богородичен: Дева роди, и рождаши, пребысть чиста, на руках Носящаго всяческая яко воистинну, Дево Мати, носивши.

Тропарь праздника, глас 1:

Во Иордане крещающуся Тебе, Господи, * Тройческое явися поклонение: * Родителей бо глас свидетельствоваше Тебе, * возлюбленного Тя Сына именуя, * и Дух в виде голубине, * извествоваше словесе утверждение. * Явлейся Христе Боже * и мир просвещей, слава Тебе.

Тропарь отцев, глас 4:

Боже отец наших, * творяй присно с нами по Твоей кротости, * не остави милость Твою от нас, * но молитвами их * в мире управи живот наш.

Кондак Григория, глас 2.

Церкве Божественный иерарх * и премудрости честный тайноглагольник, * Ниссийский бодрый ум, Григорий, * со Ангелы ликовствуя * и наслаждаяся Божественным светом, * молится непрестанно о всех нас.

Ин Кондак Григория, глас 1.

Оком душевным бодрствуя, святителю, * бодр пастырь явился еси миру, * и жезлом мудрости твоея, и теплым предстательством твоим, * вся отгнал еси злославныя, яко волки, * невредно соблюдо стадо, * Григорие всемудре.

Кондак праздника, глас 4.

Явился еси днесь вселенней, * и свет Твой Господи знаменая на нас, * в разуме поющих Тя: * пришел еси и явился еси, * Свет Неприступный.

Прокимен: Честна пред Господем * смерть преподобных Его.

Стих: Что воздам Господеву о всех, яже воздаде ми?

Апостол к Коринфяном, зачало 151.

Братие, комуждо дается явление Духа на пользу. Овому бо Духом дается слово премудрости, иному же слово разума, о томже Дусе, другому же вера, темже Духом, иному же дарования исцелений, о томже Дусе. Другому же действия сил, иному же пророчество, другому же разсуждения духовом, иному же роди языков, другому же сказания языков. Вся же сия действует един и тойжде Дух, разделяя властью коемуждо якоже хощет.

Аллилуия, глас 2: Священницы Твои облечутся в правду, и преподобнии Твои радостию возрадуются.

Евангелие от Матфея, зачало 34, от полу.

Во время оно, призвав Иисус обанадесять ученики Своя, даде им власть на дусех нечистых, яко да изгонят их, и целити всяк недуг и всяку болезнь. Сия обанадесять посла Иисус, заповеда им, глаголя: на путь язык не идите и во град Самарянский не внидите. Идите же паче ко овцам погибшым дому Израилева. Ходяще же проповедуйте, глаголюще, яко приближися Царствие Небесное. Болящия изцеляйте, прокаженные очищайте, мертвыя воскрешайте, бесы изгоняйте, туне приясте, туне дадите.

Причастен: В память вечную будет праведник: